



- SENAT -

Broj: 01-3458-1/17

Sarajevo, 24. 05. 2017. godine

**Z A P I S N I K
SA 5. VANREDNE SJEDNICE SENATA
ODRŽANE 24. 05. 2017. GODINE**

Prisutni članovi Senata: prof. dr. Rifat Škrijelj, rektor, prof. dr. Izet Rađo, prof. dr. Aida Hodžić, prof. dr. Aleksandra Nikolić, prof. dr. Maida Čohodar-Husić i prof. Zijad Mehić, prorektori, Mirza Ibrahimović, student-prorektor, prof. Mirsad Begović (po ovlaštenju), prof. dr. Mersad Čuljević, prof. mr. Mevludin Zečević, doc. dr. Jasmina Selimović (po ovlaštenju), prof. dr. Samim Konjicija, prof. dr. Zuhdija Hasanović, prof. dr. Sakib Softić (po ovlaštenju), prof. dr. Šaćir Filandra, prof. dr. Husnija Kajmović, prof. dr. Samir Čaušević, prof. dr. Dijana Avdić, prof. dr. Davorka Završnik, prof. dr. Salih Fočo, prof. dr. Mustafa Hrasnica, prof. dr. Darko Tomašević, prof. dr. Izet Bijelonja, prof. dr. Almira Hadžović-Džuvo, prof. dr. Senad Kazić, prof. dr. Fatih Destović, prof. dr. Zlatan Sarić, prof. dr. Hajrija Sijerčić-Čolić, prof. dr. Mustafa Memić, prof. dr. Muhamed Ajanović, prof. dr. Sead Vojniković (po ovlaštenju), prof. dr. Nihad Fejzić, prof. dr. Nezir Krčalo, prof. dr. Naris Pojskić, dr. sc. Senija Milišić, dr. sc. Rasim Muratović, dr. sc. Adnan Kadrić, dr. sc. Jasmin Hodžić (po ovlaštenju), te predstavnici Studentskog parlamenta Univerziteta u Sarajevu: Merim Serdarević, predsjednik SPUS-a, Mirela Mujović, Azra Dizdar, Bakir Sijerčić, Arnel Terzić, Resul Alić, Melis Aščić, studenti.

Ostali prisutni: prof. dr. Jasminka Gradašćević-Sijerčić, predsjednica Radne grupe za usklađivanje teksta Zakona, dr. sc. Suvad Konaković, generalni sekretar, i gosp. Kenan Filipović, rukovodilac Službe za pravne poslove.

Odsutni članovi Senata: prof. dr. Željko Šain, prorektor za finansije Univerziteta u Sarajevu.

Sjednica je počela sa radom u 11:15.

Predsjedavao je rektor prof. dr. Rifat Škrijelj.

Razmatran je sljedeći

D N E V N I R E D

1. Prijedlog Zakona o visokom obrazovanju Kantona Sarajevo i amandmani Univerziteta u Sarajevu na predloženi tekst Zakona.

TOK SJEDNICE

Prof. dr. Rifat Škrijelj upoznao je senatore da je na Univerzitetu u Sarajevu održano 5. sastanaka na kojima su se razmatrala sva relevantna pitanja u vezi sa Prijedlogom Zakona o visokom obrazovanju Kantona Sarajevo.

Radna grupa, formirana na 4. vanrednoj sjednici Senata od 16. 05. 2017. godine, podnijela je izvještaj u obliku prijedloga sa obrazloženjem, a u vezi sa prijedlozima amandmana na tekst Prijedloga Zakona o visokom obrazovanju Kantona Sarajevo.

Prof. dr. Jasminka Gradašćević-Sijerčić obavijestila je senatore da je usvojeno mnogo toga što je naznačeno kroz razgovore sa premijerom Kantona gosp. Elmedinom Konakovićem i pomoćnikom ministra za obrazovanje, nauku i mlade Kantona Sarajevo gosp. Sifetom Kukuruzom. Međutim, veliki dio prijedloga Radne grupe nije bio prihvaćen u ponuđenom obliku. To se posebno odnosi na upravljački sistem, sastav Upravnog odbora, nadležnosti Upravnog odbora i sistem finansiranja Univerziteta u Sarajevu.

Zatim je otvorena diskusija u kojoj su učešće uzeli: prof. dr. Rifat Škrijelj, prof. dr. Mustafa Hrasnica, prof. dr. Almira Hadžović-Džuvo, prof. dr. Naris Pojskić, prof. dr. Nihad Fejzić, prof. dr. Muhamed Ajanović i gosp. Mirza Ibrahimović.

Po okončanju diskusije konstatirano je da je Senat predložena rješenja procjenjivao tražeći odgovor na sljedeća pitanja:

- da li u Prijedlogu Zakona prepoznamo stvarnu reformsku dimenziju oslonom na evropska načela visokog obrazovanja, posebno u kontekstu: stvarne autonomije Univerziteta i odgovornosti Univerziteta?
- da li će predloženim rješenjima doći do poboljšanja efikasnosti sistema visokog obrazovanja?

S tim u vezi, većinom glasova doneseni su sljedeći

ZAKLJUČCI

1. Struktura Prijedloga Zakona trebala bi biti podijeljena na dva dijela: prvi, reguliranje djelatnosti visokog obrazovanja, a drugi, Univerzitet u Sarajevu (visokoškolske obrazovne javne ustanove). Postojeća rješenja kroz regulativu djelatnosti visokog obrazovanja u pravilu uređuju poziciju Univerziteta u Sarajevu.
2. Predložena rješenja neosporno bi bila poboljšana ukoliko su usklađena sa standardima iz međunarodnih obaveza u vezi sa ljudskim pravima i slobodama, posebno u odnosu na ona koja proizlaze iz Evropske konvencije o zaštiti osnovnih ljudskih prava i sloboda (pravo na zaštitu privatnosti, pravo na imovinu, sloboda izražavanja i sl.), drugih pravnih izvora Vijeća Evrope i pravnih akata EU (direktiva). Posebno je potrebno voditi računa o usklađenosti sa zakonskim propisima BiH koji su jedinstveni a kojima se zabranjuje diskriminacija, štiti privatnost ličnih podataka i garantira ravnopravnost spolova.
3. Finansijska odgovornost Univerziteta u Sarajevu koja proizlazi iz autonomije Univerziteta uz postojeće elemente nadzora i kontrole može biti efikasna i uspostavom trezorske jedinice (uplatom svih sredstava na račun Univerziteta). Pritom je važno voditi računa da djelotvorno funkcioniranje trezorske jedinice na Univerzitetu podrazumijeva uspostavljanje niza pratećih instrumenata kroz standarde i normative, elaborat o cijeni koštanja studija po

studentu na Univerzitetu u Sarajevu, prijedlog modela finansiranja Univerziteta u Sarajevu, uspostava jedinstvenog informacionog sistema i dr.

4. Organizacioni aspekt sadržan u autonomiji Univerziteta mora biti povezan i sa rješenjima u kontekstu upravljačkih tijela. Senat zaključuje da u sastav Upravnog odbora, kao kolegijalnog tijela Univerziteta, treba imenovati šest predstavnika Univerziteta, četiri predstavnika osnivača i jednog predstavnika studenata. Predsjednika Upravnog odbora imenuje osnivač, a pritom kriteriji za članstvo u Upravnom odboru od osnivača ne mogu biti diskriminatorni na način da se članove akademskog osoblja Univerziteta u Sarajevu isključuje iz potencijalnih kandidata.
5. Akademska neovisnost posebno se mora ogledati u pravu Univerziteta da svojim temeljnim aktom utvrdi sastav i broj članova vijeća organizacionih jedinica, odnosno Senata Univerziteta.

I na kraju, ukoliko Zakon o visokom obrazovanju bude donesen i stupi na pravnu snagu, njegova primjena treba biti povezana sa početkom studijske 2017/2018. godine, imajući u vidu potrebu donošenja novog statuta.

Sjednica je završena u 12:30.

Rektor

Prof. dr. Rifat Škrijelj, s. r.

Zapisničar:

Alma Voloder-Madacki, s. r.